




# Акафист святой преподобной Вассе Псково-Печерской



## Кондак 1

Избранней от мирскаго жития на подвиг иноческий спасительный, утешению и радости верных, преподобней Вассе похвальная воспоем пения. Ты же внимли недостойным мольбам нашим, донеси прилежне до Царя Славы и Господа, да со умилением зовем ти сие:

Радуйся, преподобная мати Вассо, помощнице наша прерадостная.

## Икос 1

Ангельстии лица возрадовашася ти, егда родилася еси в мир сей, ведяще тя предъизбранную к подвигом и добродетелем. Мы же, обретше тя добродетельную помощницу и молитвенницу, взываем ти сие:

Радуйся, возрадовавшая рождением родителей твоих.

Радуйся, ангельския усладившая очеса.

Радуйся, красотой души измлада богатая.

Радуйся, детский трепет души посвятившая Богу.

Радуйся, Духа Святаго в крещении приявшая.

Радуйся, печатью дара Духа Святаго назменованная.

Радуйся, отрекшаяся сатаны и всех дел его.

Радуйся, во Христа облекшаяся.

Радуйся, истинную веру устами восприемника исповедавшая.

Радуйся, ризою светлою одеявшаяся.

Радуйся, с пострижением власов нечистоту греха отчуждившая.

Радуйся, преподобная мати Вассо, помощнице наша прерадостная.

## **Кондак 2**

Видяще родители, яко дщи родися преславная, возблагодариша Бога, даровавшего такую милость верным, и воспеша от всея души: Аллилуиа.

## **Икос 2**

Разум даровася тебе от Бога, егда еще отроковица младая сущи, благочестию и молитве научена была еси. Ты же, яко пчела, мед добродетелей собирала еси, сего ради приими от нас пения сия:

Радуйся, от юности в благочестии воспитанная.

Радуйся, возлюбившая Бога всем сердцем своим.

Радуйся, в любви к ближнему совершенствовавшаяся.

Радуйся, родителей своих почитавшая.

Радуйся, послушанием приносившая им радость.

Радуйся, очеса твоя кротостию украшахуся.

Радуйся, яко руце твои на добродетели простирахуся.

Радуйся, нозе бо твои шествоваху незаблудным путем.

Радуйся, и нас научающая сим добродетелем.

Радуйся, в скорбех отрадо наша.

Радуйся, в молитвах прибежище верных.

Радуйся, преподобная мати Вассо, помощнице наша прерадостная.

## **Кондак 3**

Сила Господня осени тя, егда подвизалася еси на добродетели, вразуми бо тя Господь, да украсиши житие твое, аки камнями драгоценными, милосердием, братолюбием и кротостию, и воззовеши Богу: Аллилуиа.

### **Икос 3**

Имущи богатство неисчислимо в сердце своем, сложенное от юности, востекла еси к супругнику твоему Иоанну, привлекиши его сим богатством, да восприемлет тя на брак честен. Сего ради зовем ти:

Радуйся, с чистотою тела и чистоту души соблюдающая.

Радуйся, с добродетельным Иоанном в брак честен вступившая.

Радуйся, добродетельной супругницей явившаяся.

Радуйся, в таинстве брака благодать получившая.

Радуйся, с сею благодатию преславне пожившая.

Радуйся, славою и честью венчавшаяся.

Радуйся, к сему житию путеводящая.

Радуйся, помощнице брак честен соблюдающим.

Радуйся, наказательнице неверных жен и мужей.

Радуйся, верных Христови обручающая.

Радуйся, неверных от своея помощи отревающая.

Радуйся, преподобная мати Вассо, помощнице наша прерадостная.

### **Кондак 4**

Бурею естества человеческого преклоняемая ко греху, яко адамант тверд была еси, с сокрушением в покаянии очищала еси себе от зол мира сего и добродетельми блистала еси, яко заря солнечная ликующи, вопиющи Богу: Аллилуиа.

### **Икос 4**

Слышаша людие о тебе, преподобная, яко вельми добродетельми украшена, стекахуся к тебе, да почерпают от сего источника благодати. Егда же утешение получаху, согласно взываху к тебе:

Радуйся, луно, светящая в нощи греховней сущим.

Радуйся, звездо, ведущая к добродетели.

Радуйся, напитавшая алчущаго.

Радуйся, напоившая жаждущаго.

Радуйся, приившая страннаго в своя обители.

Радуйся, согревшая во мразе сущих.

Радуйся, заповедом Божиим сопричастнице.

Радуйся, добродетели всякия правило.

Радуйся, смиренном облеченная.

Радуйся, кротостию украшенная.

Радуйся, сладкоуханная цевнице.

Радуйся, преподобная мати Вассо, помощнице наша прерадостная.

### **Кондак 5**

Боготечная звезда была еси, сияющи супружнику твоему Иоанну, егда сан иерейский прият; разделяла бо еси житием твоим вся красоты и скорби пастырского его подвига, непрестанно вопиющи: Аллилуиа.

### **Икос 5**

Видеша ближний и дальний честную двоицу добродетельную во спасении и трудех жителствующую, вознесоша благодарный глас свой к Богу и воспеша тебе сия:

Радуйся, благая печальнице иереа Божия.

Радуйся, блистающая светом отчим.

Радуйся, труды пастырства разделявшая житием своим.

Радуйся, светильнице, освещающая путь скорбный.

Радуйся, премудростию венчанная.

Радуйся, иерею Божию сопутствовавшая.

Радуйся, сладость службы божественная приймавшая духом.

Радуйся, благоговейно внимавшая глаголом живота.

Радуйся, сердце свое жилищем Бога соделавшая.

Радуйся, в Бозе и ради Бога жившая.

Радуйся, светом веры и нас озаряющая.

Радуйся, преподобная мати Вассо, помощнице наша прерадостная.

### **Кондак 6**

Проповедницы людие быша, егда о подвизах преподобнаго Марка рекоша и на стогны града Пскова молву донесше, возвестиша о добродетельном житии его и подвизах. Мы же ведуще сия, велегласно зовем: Аллилуиа.

### **Икос 6**

Возсия житие преподобнаго Марка в земли Псковстей, и стекахуся в пустыню печерскую тщащиися жития иноческаго. Тако и ты, преподобная, с супругом твоим востекла еси в леса и

дебри печерстии, бегаючи мира лукавствия. Сего ради приими от нас похвалы сия:

Радуйся, прелесть мирскую оставившая.

Радуйся, к иноческому деланию прибегшая.

Радуйся, преподобным Марком умудренная.

Радуйся, его наставлением внимавшая.

Радуйся, подвиги его лицезревшая.

Радуйся, мира гленнаго не возжелавшая.

Радуйся, твоему супругу подражавшая.

Радуйся, дебрьми и лесом не уstraшенная.

Радуйся, злокозненные наветы диавола победившая.

Радуйся, ангелов теми возвеселившая.

Радуйся, со ангелы во славе небесней ныне ликуеши.

Радуйся, преподобная мати Вассо, помощнице наша прерадостная.

### **Кондак 7**

Хотящи оставити мир сей, востече честная двоица к преподобному Марку, и ту водворися на подвиги. Благоухашася молитвами преподобных дебри, яже при потоце Каменце, в пещерах же Богом зданных учредишася церковь, в нейже иноцы согласно пояху: Аллилуиа.

### **Икос 7**

Новую и преславную силу изведа двоица честная, приобщившися чину иноческому и пострижение приимши, подвиги бо усугубиша в лесех и пропастьех земных. Мы же ведуще сия глаголем:

Радуйтесь, иноческаго жития ревнителие.

Радуйтесь, пострига монашескаго возжелавшии.

Радуйтесь, в постризе Богу себе всецело предавшии.

Радуйтесь, плоть свою трудами томившии.

Радуйся, Иоанне Ионой нареченный.

Радуйся, житию пророка Ионы подражавый.

Радуйся, в пещерах яко во чреве китове пребывавый.

Радуйся, яко чрево земли бысть тебе отрадою.

Радуйся, и супружницу твою Христу обручивый.

Радуйся, Вассо блаженная, подражательнице супруги своему.

Радуйся, подобно ему, в недрах земли молившаяся.

Радуйся, всех благ земных Христа ради лишившаяся.

Радуйся, преподобная мати Вассо, помощнице наша прерадостная.

### **Кондак 8**

Странное и преславное чудо слышаша зверолови, пришедше на святую гору, и гласы пений иноческих уловивше из земли, страхом объаты бывше, поведаша о сем и возопиша Богу: Аллилуиа.

### **Икос 8**

Вся к небесным взята бывши преподобная, но и на земли усердно подвизалася в делании иночестем упражняющися. Сего ради приими от нас похвалы сия:

Радуйся, правила монашеская возлюбившая.

Радуйся, молитвою к Богу всегда пламенеющая.

Радуйся, обеты иноческие Богу принесшая.

Радуйся, послушание паче укрепившая.

Радуйся, сему дару и нас научающая.

Радуйся, нестяжание приобретшая.

Радуйся, от корысти и скверноприбытчества нас ограждающая.

Радуйся, сладость молитвы познавшая.

Радуйся, сею пищею и нас питающая.

Радуйся, пустынное житие предпочетшая.

Радуйся, в двери рая с преподобным Ионою возшедшая.

Радуйся, преподобная мати Вассо, помощнице наша прерадостная.

### **Кондак 9**

Всяких сил небесных ныне являешия сопричастница, святая и преподобная Вассо, предстоиши бо у Престола Божия и непрестанно молишися за ны, вопиющыя Богу: Аллилуиа.

### **Икос 9**

Витии многоглаголивии не могут изрещи подвиги и труды твоя, яко женское естество отвергши, к суровому пустынноческому житию востекла еси. Мы же, ведуще силу Господню, воскликнем ти:

Радуйся, Господня избраннице.

Радуйся, небесных селений достигшая.

Радуйся, любовь твою обильно на нас проливающая.

Радуйся, весь печерскую освятившая своим пребыванием.

Радуйся, подвиги твоими и нас вдохновляющая.

Радуйся, ведущая нас на Небо.

Радуйся, всем прибегающим к тебе скоро помогающая.

Радуйся, заблудших незримо вразумляющая.

Радуйся, утешение наше присное.

Радуйся, пустыни тезоименитая.

Радуйся, пустынное житие являющая.

Радуйся, преподобная мати Вассо, помощнице наша прерадостная.

### **Кондак 10**

Спасти хотя род человекъ Человеколюбец Господь, дарова нам помощницу в бедах и обстояниях, скорбех и печалех, о, преподобная Вассо, да всяк возраст утешен будет и в радости воскликнет: Аллилуиа.

### **Икос 10**

Стена еси верным и сладкая отрада. Сего ради присно зряще на образ твой, радуемся грешнии и со дерзновением восклицаем:

Радуйся, радости наша любезная.

Радуйся, мати всем крова лишенным.

Радуйся, одеждею нас снабдевающая.

Радуйся, всегда Бога о нас умоляющая.

Радуйся, иноком присная помощи.

Радуйся, в подвизех иноческих утверждающая.

Радуйся, страстей и наветов плоти отгонительнице.

Радуйся, в крестоношении нам помогающая.

Радуйся, молитве незримо научающая.

Радуйся, в сладость молитву нам претворяющая.

Радуйся, в подвиге поста укрепляющая.

Радуйся, преподобная мати Вассо, помощнице наша прерадостная.

### **Кондак 11**

Пение хвалебное приими от нас, преподобная мати, внемли молением нашим, защити нас от всякаго зла, сохрани град сей и обитель, да будет верным утешение и прибежище, идеже возможем пети: Аллилуиа.

### **Икос 11**

Светоприемная свеща бысть житие твое, преподобная! Сего ради Господь нетлением тя прослави, мы же ныне пречестную раку мощей твоих зряще, тебе восклицаем:

Радуйся, нетлением почтенная.

Радуйся, Царства Небеснаго наследнице.

Радуйся, во врата узкая вшедшая.

Радуйся, ныне с Богом беседующая.

Радуйся, Христу сраспинавшаяся.

Радуйся, слезами покаяния себе омывшая.

Радуйся, яко слезы молитв твоих обратишася в радость.

Радуйся, вельми чадолюбивая ко грешным.

Радуйся, о гресех за сих чад усердно умоляющая.

Радуйся, сердце коегождо зрящая.

Радуйся, доброе намерение целующая.

Радуйся, преподобная мати Вассо, помощнице наша прерадостная.

### **Кондак 12**

Благодать ти дана от Бога милостию посещати чад обители твоея, на месте, идеже ты житие монашеское провоздала еси. Мы же введуще сие и радуящиеся прилежне, во умилении восклицаем Богу: Аллилуиа.

### **Икос 12**

Поюще тя, преподобная мати Вассо, не возможем песен достойных составить ко прославлению имене твоего честнаго, токмо на любовь твою надежду возложим, да восхвалим тя пении сими:

Радуйся, житием своим Бога воспевшая.

Радуйся, питающая нас хлебом небесным.

Радуйся, девства страже неусыпный.

Радуйся, иноков вельми возлюбившая.

Радуйся, места сего оградо необоримая.

Радуйся, града Печер оплоте верный.

Радуйся, Псково-Печерския обители украшение.

Радуйся, яко рака твоя ныне зрима есть.

Радуйся, фимиаме молитв усердный.

Радуйся, ты бо вся прошения наша слышиши.

Радуйся, яко николиже нас оставляеши.

Радуйся, преподобная мати Вассо, помощнице наша прерадостная.

### **Кондак 13**

О, преподобная и всехвальная мати Вассо, обители Псково-Печерския инокине! Внемли милостивно молением нашим и вся прошения наша исполни, да восхвалим Бога песнию: Аллилуиа.

*Этот кондак читается трижды, затем икос 1-й и кондак 1-й.*

### **Молитва святей преподобней Вассе Псково-Печерстей**

О, всехвальная и преподобная мати наша Вассо! Сосуде Богом избранный, и аки каменьями драгоценными добродетельми украшенный! Обители Псково-Печерския красото и славо; жития иноческаго утверждение и правило. К тебе ныне припадаем, и со слезами колена сердца нашего пред ракою мощей твоих преклоняем, мощи твоя любезно чествуем и вельми радуемся, зряще благоуханное и праведное тело твое, никогдаже покидающее ны, но на всяк день и час в честней раце пребывающее, во граде и обители сей на радость верным. Темже из глубины души к тебе взываем: внемли недостойным молением нашим; услыши глас сирых раб твоих, в горких прошениях к тебе приникших, исполни их скоро. Буди любящая мати к скорбящим чадам и прошения наша скоро вознеси в Небесное Царство, к подножию ног Господа и Спасителя нашего. Ты в благочестии и вере воспитанная, даруй нам, да и мы твердо держим веру нашу православную и благочестием украшаемся. Ты супружницею благоговейнаго Иоанна ставшая и во браце спасение почерпшая, егда же супруг твой пресвитером соделася добре стадо свое управляя, тогда ты в пастырских трудах ему усердно помогаше житием твоим праведным, яко звезда сияющи в нощи греховней сущым, и скорби и радости его непрестанно разделяющи! Сего ради и всем сущым в брачном житии, помози спасение улучшить, в мире и единомыслии житие проводити, брак честен и ложе нескверно блюсти. Ты брачному житию монашеское предпочесть, на склоне лет твоих вместе с супружником твоим стопы в весь Печерскую к водам потока Каменца направившая, да тамо вкупе с преподобным подвижником Марком в делании иночестем подвижаетесь! Помози и нам нозе наши к добродетели направляти и всегда от прелести мира сего на спасительное делание тщатися, да омыют и наша беззакония и грехи спасительныя воды молитв и подвигов. Ты с супружником твоим вкупе чин монашеский приявшая и скорби жития иноческаго понесшая, даже до смерти твоея, тщаливо Богу работающи, да стяжеша венцы небесныя; умоли Бога, да и мы в подвизах иноческаго делания укрепимся и вся скорби и тяготы на радость преложим, да наследим и мы венцы небесныя твоею помощию и молитвами о нас, чадах твоих, восхваляюще всеблагаго Бога, даровавшаго такую заступницу верным, ныне и в безконечныя веки. Аминь.